

Sarea

INAKI SEGUROLA



JAUN eta jabe izan da katea gizona lotzekoan. Nekez irudika zitekeen erromatarren garaiko esklorik edo Afrikari eba-
tsitako beltzik katerik gabe.

Ederra zen katea bentzutuaren soinean: ikusgarria, astuna, bel-beltza.

Aspaldi galdu zuen kateak bere erregetza: baldarregia eta nabarmenagia izan nonbait, eta hausten ez oso zaila. Gaur egunean sarea dabil laineran, eta sareak galdu du katea. Munduaren metaforarik onena bihurtzeko martxa darama sareak; dena da sare-itzura-koa, kasik lotura eta lokarri oro da sare: espiontzako sarea, errepideena, ikastolena, putetxeena...

Airean usoa, uretan arraina eta lehorrean edozer gauza harrapatzen du sareak, bertatik bezalaxe urrutitik ere. Sareak 'informazio' izena du orain, eta 'telematikoa' du deitura. Internet eta gainerako 'net' guztiak dira lehorreko bolantak: edozer ('zer' eta 'zertarako' haur-galderak dira hemen, erantzunik gabeak), edozer eta den-dena katiatzen eta korapilatzen da informaziozko komunio, jaunartze edo ostiakunde teknomistiko horretan. Delako sare hori arina da oso katearen aldean, ezin ikusizkoa gainera, eta askatasunaren irudipena ere ezeztatzen ez duena gehienetan: hargatik da urratzen nekezagoa. (Bidenabar: katetik teknosarerako bidea urte hauetantxe egin dute lau hankako zakurrek; belarri-mamian jositako txip batek lotzen du orain, zakurra, lehen kateak baino estuago).

Indarrean dugu gaur sareak, baina, izatez, armiarma bezain zaharra da; beti katiatu izan da eulia armiarma-sarean. Gizonak nola berretu eta barneratu zuen gero sareak..., besterik da hori, baina aspaldi (orain 75 urte) emana dago esplikazio poetiko xoragarri bat, Azkoitiko Urkiologiren ahoz: «armiarmaren mendian daude / gizon batzuen buruak, / orregatik gertatzen dira / ikusten diran moduak».

Ceud Mile Failte!

ALLANDE BOUTIN



ONGI etorri! gaelike-
raz.

Horra Eskoziako Highlandetan jendea errezeibitzeko Gaëlek duten espresioa; eta Fort William-eko herrian kokatzen den 'Mc Donald' berriaren atarian irakur daitekena. Bertan, 'Mac Mor' bat eska dezakezu, erran nahi baita 'Big Mac-a' edo ta 'Mc Bonnach Hama is ubh agus slisean'... delako 'Arraultze eta xingar Mc Muffin patatekin'.

Ez pentsa jaki-azkar edo Fast Food multinazional famatu batek erosi nauenik... Ez, bainan orain dela gutxi, Eskozian negoela 'The Scotsman' egunkariako artikulu batean irakurritako berri horrek Angeluko 'Mc Donald-a' gogorarazi zidan. Zeren hemen ere, Fast-food jatetxeak euskaraz menuak aurkeztu ditu. Horrelako jatetxeek dakarten ohizko eztabaida baztertu, leku faltaz, hizkuntzaren tratamendua baizik ez nuke aipatu nahi. Eskozian zein Euskal Herrian, tokiko mintzairak erabiltzen direla... Demagogia hutsa? Ala azkenean zor zaien errespetuaren seinalea? Ala interes komertzialaren seinalea? Azken hori dela iduritzen zait, eta ongi deritzot gainerat, zeren hain xokoratu eta baztertuak izanki eta hil zorian izan arren, euskara eta gaelikera horrelako tokietan erabiltzea, hizkuntz minoziratuaren balio ekonomiko eta komertziala ezagutzea da. Eta hori ez da gutti... Nahiz egia erran, 'euskal arraultze eta xingarrak' nahiago ditudan!



Zenbat?

Mirakuiluz kanpo, Pazko zaharreko hirukotea izanen da Chirac-Jospin-Balladur, bainan sailkapen hortan ote ala beste batean? Hiruak nonbait han dabilzala diote ikertzaleek. Hiru horien artean garraitaldi gogorra izanen da nahitez. Hortakotz da ere idortu eta samindu Chirac eta Balladur-en arteko auzia. Hainbestetaraino non ixorio horrek ondorio ainitz ukan baitezake bai eta ekar berekin, nehork uste baino

HEMEROTEKA



Kleenex hori erabilia zen. Mukiz beteta zegoen.

GALLEGO & REY / DIARIO 16

lehenago, deputatu-bozak!

J.-B.D.

• Enlata.

Axolazko gauzak

Ezbairik gabe, Abertza-

leen Batasuna abertzaleen eztabaida politikorako gune bihurtze da eta tokian tokiko taldeetan taktikak diseinatu, gogoetak sendotu eta ekintzak landu egingo dira. Funtzionamendu arauak ze-

haztuta daudelarik, orain guri dagokigu gure proiektuen, aldarrikapenen eta xedeen heineko izatea. Abertzaleen Batasunarentzat axolazko gauzak abiatu egin dira.

RICHARD IRAZUSTA

ZUZENDARIARI

Intsumiso
lankidearekin
elkartasuna

Datorren astelehenean, apirilak 10, Urumea Ikastolako lankide dugun Xabier Balerdi irakaslea, bere burua intsumisotzat aurkezteagatik epaitua izango dela adierazi nahi dugu.

Eskola instituzioa, bakerako hezitzen ahalegintzen da. Honetan dihardu bertako irakasle honek eta edozein ejerzitorekin kolaboratzeari uko egiteagatik, zigorra jasotzeko arriskuan egotea, kontraesan handia dela deritzogu.

Horrexegatik, epaileari gure lankide Xabierrentzat zigor-eza eskatzeaz gain, gure jarrera honen agerpen hau izenpen-tzen dugu.

URUMEA IKASTOLAKO
IRAKASLEGOA
Hernani (Gipuzkoa)

Gure royalty-ak
exijituko ditugu?

Badirudi Donostiako Udaletxeak kontzientzia eragozpena eta, badakizue, hain 'insolidarioak' eta 'xelebreak' diren intsumisoren kontura, hiriaren sustapen kanpaina berri bati ekin diola.

Topaketa folkloriko hauen antolatzaileek gu zein gai hau jorratzen ari diren

bertako talde desberdinak inolaz ere kontutan izan ez gaituztela gogoan izanik ere, aipatu udaletxeak —hauteskunde aurreko giroan justu— antolatu dituen topaketa hauek sortuko dituen etekinen zati bat eskatzekotan gaude. Norik pentsatuko zuen gure jarrera antimilitarista eta kartzela zigorrak turistak erakarriko zituenik Donostiarentzat? Ez genuke harritu behar, nahiago baita agian, besteak beste, militar bat izan daitekeen moduko jende 'errespetagarria' ekarri. Eta horri 15.000 pezetan kostatzen den izen-emate tasa (izen-emate soila estaltzen du diru horrek) gehitu. Prezio ganorazkoa, argi da, gai honetan interesatua den edonork topaketetan parte har dezan.

Gipuzkoako Intsumisoren Batzarrek bere haserre adierazi nahi du kontzientzia eragozpenaren aitzakiaz antolatzen diren ekimen elitisten zein aurre-hauteskunde kiratsa darion maskarada honen erabileraren aurrean.

PATXI AGIRRE
Donostia

Inazio Oliveri

Prentsaz baino ez zaitut ezagutzen, gauza gutxi beraz, baina hala ere, konfidantza ematen duten horietarikoa zarela uste dut, eta hau ez da edozer esatea gaur egun, politikari bati buruz ari bagara.

Eta isladatzen duzun konfidantza ho-

rretaz kutsaturik idazten dizkizut lerro hauek, arretaz irakurriko dituzulakoan.

Oraingo, nik baino hobeto jakingo duzu, Euskal Herriko Unibertsitateetik orain hiru urte kanporatutako irakasleen historia eta gaur egungo egoera zein den, zure lanaren zatia baita. Beraz, ez naiz honetaz luzatuko. Agian jakingo ez duzuna zera da, irakasle horiek zelakoak diren eta zerk bultzatu dituen hartu dituzten neurriak hartzerak. Nik hurretik ezagutzen ditut, eta benetan diotsut, zu eta ni bezain abertzaleak direla, irakas-kuntzarako gaituak, jantziak, euren lana maitatu egiten dutenak, eta, euskaragatik eta unibertsitateagatik lanpostua sakrifikatzeraino heldu direnak. Apur bat burugorrrak, pentsatuko duzu agian, behar bada, baina argiak eta garbiak, euskaldunok sasoi batean izaten ei ginela-koak.

Horrexegatik eskatzen dizut, kontseilari izateaz gain, gizona eta abertzalea ere bazarelako, gure hizkuntza, unibertsitate eta aberriaren alde hain eskuzabal jokatu duten hauekin, zuk ere esku zabal jokatzeko, eta historiara, arazo latz eta kafkiano hau, bihotzez eta abertzaletasunez konpontzen jakin duen kontseilari moduan pasatzeko. Ez dut uste Euskal Herri zatitu honetan, eskertuko zaituen bakarra izango naizenik.

JOSERRA BILBAO
Bilbo

GAIA JARRITA



Eugi-Beloki

Pilota dugu Euskal Herriko kirol guztien errege, urte askoan Retegi gendun buruz-buru jaun ta jabe, baina gazteak beren kabitik hegaka hasi dirade, horren seinale Eugi-Beloki gaur Labriten parez-pare, herrialde hau geldo ez dadin bere txapeldunik gabe.

MANOLO AROZENA

Egunkaria

Batzorde Parekidea: 72564 E / Lege Gordaia: SS 800/90



OJDK IKUSKATUTAKO HEDAPENA

Administrazio Kontseiluko Lehendakaria: MARTIN UGALDE

Kontseilu Editorialeko Zuzendaria: JOAN MARI TORREALDAI

Kontseilari Ordezkaria: INAKI URIA

Zuzendaria: MARTXEL OTAMENDI

Gerentea: FERMIN LAZKANO

Publizitatea: MARI JOSE SARASA

HELBIDEAK

Egoitza nagusia: Gudarien etorbidea, z/g / 20140 Andoain
☎ 30 02 22 / Erredakzio faxa: 30 02 55 / Publizitateko faxa: 30 07 07

Araba: San Antonio, 20-1. ezker. / 01005 Gasteiz / ☎ 23 38 72 / Faxa: 23 38 73

Nafarroa: Iratxe Monastegia, 45-13. esk. / (Irintzi dorrea) / 31011 Iruñea
☎ 17 80 78 / 79 / Faxa: 17 80 77

Bizkaia: Zabalburu Enparantza, 2-1. ezker. / 48003 Bilbo
☎ 410 40 46 / Faxa: 410 37 15

Lapurdi / Nafarroa Beherea / Zuberoa: Pannecau 14, 1 / 503 Posta
kutxatila, / 64100 Baiona / ☎ 59 59 35 75 / Faxa: 59 25 75 11